

AKASHVANI AIZAWL

REGIONAL NEWS BULLETIN

RACE

Ramthar Veng Branch YMA Education Sub-Committee Aizawl buatsaih, Ramthar Veng Aptitude Challenge Examination (RACE) 2025 result puanna hun chu School Education Minister Dr. Vanlalhlana'n a hmanpui.

Dr. Vanlalhlana chuan mi tumruhte'n hlawhtlinna an chang thin tih sawiin, khawvel huapa mi lâ leh hmingthangte pawh hi hlawhchhamna tam tak lo tawng tawh thinte an ni, a ti a. Zirlaite chu nasa taka lehkha zir tura fuihin, kawng tinrengah hlawhtling thei vek lo mahse mahni nih tumah theuh chiang turin a fuih a. Hlawhchham châng pawha beidawng mai lova, tumruhna nena theihtawp chhuah ngam thinte chu a tawpa hlawhtlinna chang thinte an nih thu a sawi baw. Minister chuan Ramthar Veng Branch YMA thiltih chu chhawmnun zel tlak a nih thu leh veng bil mai ni lo ram tân pawha chhenfakawm a la nih ngei a beisei thu sawiin, rah tha tak a chhuah ngei theih nan duhsakna a hlan a ni.

Ramthar Veng Branch YMA hian an vengchhung zirlai naupangte tan Aptitude Examination hi buatsaihin zirlai 300 chuangin exam hi an bei a. Vengchhung nu leh pate sum thawh tling khawm cheng nuai 2, sang 9 leh 900 atangin lawmman buatsaih a ni. Zirlaite hi an pawl san dan milin chi hrang 4 ah then an ni a. Zawhnate hi Optical Mark Recognition (OMR) hmanga chhan tura buatsaih niin, category tin tan a hran theuh siam a ni.



REFUGEE-LAWNGTLAI

Lawngtlai district bawrhsap Pu Cheemala Siva Gopal Reddy chuan raltlan thenkhat chu an duh duha tei kualin, District dang dangah an kal avangin an dinhmun dik tak chiang taka chinchhiah a harsa thin tih a sawi.

Lawngtlai District Level Committee on Refugee chu an Chairman Pu Cheemala Siva Gopal Reddy kaihhruai-in tun hnai khan Lawngtlaiah an thutkhawm a. Bawrhsap chuan Lawngtlai District chu ramri a awm a nih avang leh thenawm rama buaina a awm mek avangin ratlante buaipui kawngah fimkhur a tul hle a ti a. Lawngtlai district chhung khaw thenkhatah phei chuan daw. Lawngtlai district chhunga raltlan awmte 'Biometric Enrolment' ti tura hmalak a nih tur thu tarlangin, VC, tlawmngai pawlte leh mipuite chu theihtawpa sawrkar tawiawm tlat turin a sawm ani.

Thutkhawmah hian 'Biometric enrolment' kalpui dan tur kawng hrang hrang sawiho a ni a. Biometric Enrollment - chu a hma thei ang bera kalpui ni se, Lawngtlai Town chhunga Raltlan camp leh mi In luaha awmte tih hmasak nise an ti a , Lawngtlai District chhunga Myanmar leh Bangladesh atanga raltlan awmte tan Biometric enrollment tih vek tura a ni ang a. Biometric Enrolment -ah hian an Hming, Pa hming, Mizorama luh ni, an lo luhna hmun, an ram sorkarin identity card a siamsak leh an hnathawh bakah an kutze thla leh thla te lak khawm a ni dawn a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah thin a ni.

Zanin dar 6 leh a chanve-ah Chanchinthar puan leh a ni ang.



MANN KI BAAT

Prime Minister Narendra Modi-a’n hriselna lam atanga social security thlengin ramn kawng tinrengah hma a sawn chho zel tih sawiin tunah chuan India ram mipui tam zawkin hamthatna chi hrang hrang an chhawr tangkai mek a ni, a ti.

Vawiin Akashvani-a Mann Ki Baat hun a hmannaah tun thla ni 21-a International Yoga Day hmanna chungchang tarlangin Pu Modi-a chuan he ni lawmnaah hian ramchhung mi vbch tel bakah khawvel pum an tel a ni, a ti a, nitina yoga hmangtu an pung chho telh telh a ni, a ti.



CATERPILLAR OUTBREAK

Khawzawl DsitRICT a khaw pathum - Vangtlang, Chalrang leh New Chalrang khua te lo a an buh eichhetu hnahkhawr pangang puang chuan zia-awm lam a pan.

Khawzawl district agriculture officer (DAO) Pi Lallawmzuali'n a sawi danin loneitute hnena an sem rannung thahna hlo chuan a thawk tha hle niin loneitute'n an sawi a ni a ti a. Pangang puanna Chalrang, New Chalrang leh Vangtlang khua-ah te hian tun ang hun bawr velah , kumtin hnahkhawr pangang hi a puang thin niin DAO chuan a sawi a. Rannung suatna hlo an pek thin kha an haw ta lo deuha hriatna a awm avangin kumin hi chuan a chi dang an hmang a, a thawk tha hle niin a sawi a ni. Rannung thahna hlo an hman hma avangin buh kungin a tuar lo tura an ngaih thu leh an buh thar pawh a tlem phah lo tura an ngaih thu Pi Lallawmzuali chuan a sawi bawk.

Puan tawh angin Chalrang leh New Chalrang khua te hian lo atan ram theh inang neiin chhungkaw 210 lo-ah Hnahkhawr Pangang hi hmuh tur a awm a, heng zinga chhungkaw 70 lo-ah a puang nasa zual a. Vangtlang khuaah hian chhungkaw 80 lo-ah Hnahkhawr Pangang hi hmuh tur awmin chhungkaw 10 lo-ah a puang nasa zual a ni.

Pachhunga University College zirlaite chuan he'ng khuate hi tlawhin pangang puang hi an han zir chiang tawh a. Pangangte hi hawnin laboratory lamah an zir chiang dawn a ni.

Hetih lai hian Khawzawl leh Neihdawn khawmite vaimim kungah pangang chi khat fall army worm hmuh a ni a, amaherawh chu, vaimim hi a tihchhiat hma-in rannung thahna hlo hmangin an tirem leh tawh ni a thudawn a ni.

